

Kalaallit Nunaannut isertitaqarfiusinnaasunik nutaanik ataatsimut misissueqqullugit, nunap aningaasaqarneranik nukittorsaanissaq aammalu Danmarkimiit ataatsimoortumik tapiissutitigut (bloktilskud) pinngitsuuisinnaassutsip annikillisarnissaa siunertaralugu Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuinerup inerneru UPA27 nallertinnagu Inatsisartunut agguanneqassaaq.
(Inatsisartunut ilaasortaq Erik Jensen, Siumut)

Siullermeerneqarnera

Siullermik, Naleraq sinnerlugu siunnersuuteqartoq aalajangiiffigisassatut siunnersuuteqarneranut qutsavigaarput.

Kalaallit Nunaat namminiilivinnaviangilaq nalunaarusiunnarluta piniarutta, tigussaasumik iliuseqalertariaqartugut, Naleqqamiit isumaqarpugut.

Naleqqamiit isumaqarpugut nunatsinni nalitunerpaaq tassaasoq Inuk, inoqangippat nunarput qanoq ineriartussagami?

Siunnersuutip siunertaraa Naalakkersuisut peqquneqassasut Kalaallit Nunaannut isertitaqarfiusinnaasunik nutaanik ataatsimut misissueqqullugit, nunap aningaasaqarneranik nukittorsaanissaq aammalu Danmarkimiit ataatsimoortumik tapiissutitigut pinngitsuuisinnaassutsip annikillisarnissaa siunertaralugu.

Tamanna pingaaruteqarpoq. Mississuiuarpuulli, taamaattumik itinerusumik aningaasat qanoq nunatsinnut iluaqutaanerunissaat suliarisariaqarparput.

Naleraq isumaqarpoq, tamanna aningaasarsiornermut tunngasuinnaanngitsoq. Aamma namminiilivinnissamut, akisussaaffeqarnermut aammalu Kalaallit Nunaata nunatut nukittunerusumik inissisimalernissaanut tunngavoq.

Isertitaqarfiusinnaasut amerlanerit ilisimareerpagut.

Nalunngilarput aalisarnek, aatsitassat, uulia, erngup nukinga, takornariaqarnek, paasissutissanut toqqorsiviit (datacentre), imeq avammut tunisinnaasagut, aammalu siunissami issittumi imaatigut assartuussineq Kalaallit Nunaata aningaasaqarneranut pingaaruteqalersinnaasut.

Kisianni apeqqut pingaarnerpaaq unaavoq: Isertitat nutaat sumi pissarsiarineqarsinnaappat?

Qanoq ililluta qulakkiissavarput naleqarnerulersitsineq?

Aalisagaq Kalaallit Nunaanni pisarineqarpat, kisianni nunatta avataani naleqarnerulersinneqarpat, taava Kalaallit Nunaat naleqarnerulersitsinermiit annaasaqarpoq.

Takornariaq Nunatsinnut takornariarpat, kisianni akiliut, piginnittuunerup iluaqutissartai iluanaarutillu nunatta avataaniippata, taava Kalaallit Nunaat naleqarnerulersitsinermiit annaasaqarpoq.

Suliffeqarfik nunatta pisuussutaanik atuippat, kisianni iluanaarut suliffeqarfissuup iluani akigititanik, ernianik, aqutsinermut akiliutinik imaluunniit aaqqissuussinernik allanik nunatta avataanut nuunneqarsinnaappat, taava naleqarnerulersitsinermiit annaasaqarpoq.

Taamaattumik Naleraq isumaqarpoq misissuineq isertitaqarfiusinnaasunik nutaanik allattorsimaffiinnaassanngitsoq. Aamma Nunatta ullumikkut naleqarnerulersitsinermiit annaasartagaanik misissueqqissaarnermik imaqtartariaqarpoq.

Misissorneqartariaqarput nunatsinni tunisassionerup amigaateqarnera, nioqutissanik tikisisarnerup annertussusia, transfer pricing, marloriaammik akileraannginnissamut isumaqatigiissutit, niuernikkut isumaqatigiissutit kiisalu kalaallit piginnittuunissaat.

Isertitaqarfiit nutaat pilersinneqaraluarpataluunniit iluaqutaanaviangillat, naleqarnerulersitsineq kingorna nunatta avataanut anippat.

Kalaallit Nunaat ersarissunik niuernikkut isumaqatigiissuteqarnissamik aammalu niuerfinnut pitsaanerumik isersinnaanissamik pisariaqartitsivoq.

Aalisakkat, qaleruallit, puisit, puisit amii, imeq, nukissiuutit mingutsitsinngitsut aammalu issittumi pitsaassusilimmik tunisassiat Nunatsinnut iluaqutaasumik niuerutigineqarsinnaasariaqarput.

Naleqqamiit isumaqarpugut uagut tunisassiassanik avammut tuniniaasuinnaassanngilagut. Tunisassiap naleqarnerulersinneqartarnerani annerusumik nammineq piginnittuusariaqarpugut.

Aamma marloriaammik akileraannginnissamut isumaqatigiissutit Kalaallit Nunaata soqutigisaanik qulakkeerinnittariaqarput. Naleqarnerulersitsineq Nunatsinni pippat, akileraartitsisinaaneq sapinngisamik Kalaallit Nunaanniittariaqarpoq.

Tassunga ilanngullugu transfer pricing-imut nakkutilliineq nukittorsartariaqarpoq, iluanaarutit suliffeqarfiit iluanni akigitat, ernianik akiliinerit, aqutsinermut akiliutit imaluunniit aqqissuussinerit allat aqqutigalugit nunatta avataanut nuunneqarsinnaajunnaarlugit.

Naleraq aamma isumaqarpoq nunatsinni tunisassiorneq aammalu tikisitanik taarsiilluni nammineq tunisassiorneq misissuinerit ilaatinneqartariaqartut.

Nunatsinnut amerlasoorpassuit tikisinneqartarput. Ilaatigut tamakku pinngitsoorneqarsinnaangillat. Kisianni ilaat nunatsinni tunisassiarineqarsinnaapput, suliarineqarsinnaapput imaluunniit poortorneqarsinnaapput.

Assersuutigalugu naatitat containerini imaluunniit naatitsivinni naatinneqarsinnaasut, immuup tunisassiarineqarsinnaanera, toqoraavilerineq, neqinik agguineq, aalisakkanik suliareqqittarneq, puisinit tunisassiat, ammit, saarullit, kapisillit, tuttu, umimmak aammalu nerisassat allat.

Tamanna aningaasanuinnaq tunnganngilaq. Suliffissaqartitsinermut, pilersuinerup isumannaanneranut, piginnaasanik ineriartortitsinermut aammalu najukkani ineriartortitsinermut tunngavoq.

Aamma erngup nukinga inuussutissarsiornerit pitsaanerusumik ataqatigiissartariaqarparput.

Erngup nukinga innaallagissatut mingutsitsinngitsutut kisiat isigineqassanngilaq. Erngup nukinga kalaallit tunisassiornerannut tunngaviusariaqarpoq.

Aalisakkanik suliffissuaqarneq innaallagissamik, imermik, nillartaartitsinermik, qerititsivinnik, panertitsinermik aammalu poortuinerit pisariaqartitsivoq.

Taamaattumik misissorneqartariaqarpoq erngup nukingata, umiarsualivissat aammalu imeq qanillugit inuussutissarsiornerit immikkut immikkoortortanik pilersitsisoqarsinnaanersoq.

Kalaallit Nunaat aningaasaliisunut ammasuusariaqarpoq, kisianni mianersuaallornataangittoq.

Suliffeqarfiit anginerusut nunatsinni pilersitsinissamut kajumissuseqalersinneqarsinnaapput, kisianni tamanna pissaaq piumasaqaatitalimmik: najukkami suliffissaqartitsineq, ilinniartunik



sulilersitsineq, akileraarnej, piginnittut ersarissuunissaat aammalu naleqarnerulersitsineq piviusumik Kalaallit Nunaanni pinissaa.

Naleraq aamma isumaqarpoq sineriaq tamakkerlugu ineriartortitsineq pingaaruteqarluinnartoq.

Isertitaqarfiit nutaat Nuummi imaluunniit illoqarfinni annerni kisiat ineriartortitsissanngillat. Nunaqarfiit, isorliunerusut aammalu illoqarfiit mikinerit Kalaallit Nunaata aningaasaqarnikkut tunngavianut ilaatinneqartariaqarput. Maanna takusinnaavarput eqititerinermi kingunerluutaasinnaasut sorpassuartigut.

Taamaattumik Naleraq siunnersuutip siunertaanut pitsaasumik isiginnippoq. Kisianni kaammattuutigaarput misissuineq erseqqissumik, atorreqarsinnaasumik aammalu iliuseqarnissamut tunngavissiisumik suliarineqassasoq.

Kalaallit Nunaat isertitaqarfiusinnaasunik amigaateqanngilaq. Taamaammat nunat allat pilernguppaatigut.

Kalaallit Nunaat aaqqissuussinernik pisariaqartitsivoq, isertitat annerpaamik Kalaallit Nunaanniiginnarnissaat qulakkeerniarlugu.

Aningaasanik amerlanerusunik ujarlernerinnaanngilaq. Naleqarnerulersitsinerup nunatta avataanut anisarnera unitsittariaqarparput.

Taamatut oqaaseqarluta Naleraq sinnerlugu Inuussutissarsiornermut Aatsitassanullu Ataatsimiititaliamut ingerlaqqinnissaa innersuutingaarput.

Qujanaq.